

تحت السرير

حكايات وبورتريهات بالعامية

obeikandi.com

اسم الكتاب: تحت السرير

تأليف: إيناس حلیم

رقم الإيداع: 7900\2014

الترقيم الدولي: 1-60-6376-977-978

إشراف عام:

محمد جميل صبري

نيفين التهامي

© جميع الحقوق محفوظة، وأيُّ اقتباس أو إعادة طبع أو نشر في أي صورةٍ كانت ورقيةً أو إلكترونيةً أو أية وسيلةٍ سمعية أو بصرية دون إذن كتابي من المؤلف؛ يعرض صاحبه للمسائلة القانونية.

داركيان للنشر والتوزيع – 22 ش الشهيد الحى بجوار مترو أم المصريين – الهرم
محمول: 01005248794 – 01001872290 – أرضي: 0235688678
www.kayanpublishing.com – info@kayanpublishing.com

تحت السرير إيناس حليم

حكايات وبورتريعات بالعامية

obeikandi.com

إهداء

إلى روح خالتي «كاميليا»
وكل اللي عاشوا حياتهم يحطوا العسل ع السمك..

obeikandi.com

شكرًا

— نهلة عبد الشافي،
حضانها وبيتها وحواديتها...

obeikandi.com

شكرًا لكل من:

كريم أبو ريذة، الشيماء حامد، حكيم أبوكيلة، زينب فرحات،
غادة خليفة، أسماء الشيخ، هشام أصلان، هبة خميس، ستوديو
جناكليس وكل من ساهم في إتمام هذا العمل.

obeikandi.com

طبّق الحِنَّة

obeikandi.com

مخدتش من الهنا غير حرفين من اسمي..
أشم ريحته،أخطي فوقيه لكن ملمسوش..
«العادب ينطب والمالح ينكب»
- هو أنا عَدبة يا ستي؟
-انتي كراميلا..

ستي كانت أكثر واحدة بتتفائل بيها البيوت في النوبة.. يجييوها
في الأفراح تزگرد وتبخر العرسان وتُصَبِّلهم اللبن بالسكر.. العروسة
ترش اللبن على وش العريس وهو يَكْب البلح على طرحتها..
وأنا دائما كنت ببقى واقفة في ديل ستي، أمسك السلة الي فيها
الشعرية وقوالب السكر، أتفرج ع العريس من بعيد وهو بيلبس
الأسورة الحريري وأمه بتحط الصندل على راسه..
مكنتش بحب أبص في وش العروسة! مع إني لما كبرت مفيش
عروسة في البلد ملاقتينيش جنب جناحها..

شجرة مريم قريبة من بيتنا.. أنا والبنات اتعودنا نكتب الي
نفسنا فيه في ورق، نطبقه ونعلقه بمشابك غسيل على فروعها..
ستي كانت بتقول لازم من وقت للتاني نصوم عن أكثر حاجة
بنحبها.. زمان كنت بصوم عن النبق..
مع إنه مُر، بس كنت بحبه.
مبقتش أحب أي حاجة مُرة..

دلوقتي في عز صيامي بطلع سطوح بيتنا.. أخلط الحنة وأعجنها
بمئة الورد، أزين الشموع بشرايط الذهب وأزرعهم في الطبق.
العروسة في ليلتها بتبقى بدر.. وأنا بحب أحني رجلين الصبايا..
لما بتروّج باخد طبق الحنة وأقفل على نفسي الأوضة في الضلمة،
أولع شمعة شمعة وأحني رجليا..
أغرسها كلها في الطبق وأغني....

ستي لما ماتت كل واحدة من بنات العيلة خدت من دولابها
حاجة: اللي خدت شالها واللي خدت مكحلتها، واللي طلّعت
طقم كاسات فرحها من تحت السرير...
أنا عيني كانت على دلالية ذهب دايماً قريبة من صدرها، عزت
عليا نفسي أطلبها..
هي كانت قشرة بس عليها اسم ربنا..
قبل ما تموت كانت حاطه كف مريم في برطمان إزاز ملياه ميه
وساندة بيه باب أوضتها.. أخذته حطيته تحت سريري.. أنا عارفة
إن كفها طيب هيطبطب عليا وقت ما أحواجه.. وأنا مش طالبة
يا ستنا غير شاب حسن.. كتفه حنين وجيينه باصص للسما..

أول الشتا ورقنا المطبق بيطير مع الهوا..
نستنى الصيف عشان نعلق ورق جديد...

تحت السرير

obeikandi.com

أنا عارف إني غلطت، بس والله ما كان قصدي..
من سنتين كانوا بيبقوا نقطتين تلاتة بس، مكانوش بيعملوا مشكلة
زي اليومين دول.. و «أم أحمد» مكانتش بتحب تحسني بحاجة..
علشان هي بنت أصول،
أصل بنات الأصول دول عاملين زي القطن، أبيض ويفرح القلب..
بس ياريتة فضل.

الألبومات الكبيرة اللي تحت السرير كان جواهرهم صور من أيام ما
«أحمد» كان بالكافولة..
الواد ده وحشني أوي، من يوم ما سافر والبيت مبقالوش طعم،
الله يلعن أبو الظروف اللي خلت الولاد تلاقي خيرها في بلد
غيرها..

مكنش قصدي أبوظهم، بس أنا برضه حاولت أعمل أي حاجة،
مسكت كل ألبوم وطلعت منه الصور اللي لسه متبهدلتش، رصيتهم
كلهم في ألبوم واحد وحطيته تحت مخدتي، ولما «أم أحمد» خدته
مني وحطته فوق الدولاب عشان مطولوش.. مزعلتش منها، هي
معاها حق برضه.

صوت عصاية المنجد وهي بتضرب في القطن بتفكرني بأيام حلوة..
حلوة أوي..

أيام ما أجرت الجراج من الحج «كمال» عشان نوجد شوار «أم أحمد»،

من فرحتها نجدت سبع تـ لحفة وست مخدات ومرتبين، أصلنا مكنش معانا فلوس نوجد ساعة جوازنا غير لحاف واحد ومرتبة.. بس كانت علو كدة وتفرد أجدعها زهر، مكنتش فطسانة زي يوميهـا..

«أم أحمد» بقالها فترة بتحلم إن زهرها واجعها.. هي مكانتش عايضة تقولي بس أنا جرجرتها في الكلام، أصلها هبلة وعلى نيّتها.. هو صحيح هيفضل واجعها، بس الحمد لله مدام لسه متكسرش..

أنا عارف إنها متقصدهش، بس أنا صعبت عليّ نفسي لما لقتها بتدور على المشمع اللي كانت بتفرشه تحت الواد «أحمد» وهو عيل، وفرشته تحتي.. بعد ما نجدت المرتبة الجديدة..

نوٲة زرقا

obeikandi.com

«فلمنجو»..

قادر يمشي برجل واحدة ع الميّه رغم كل الأخرام الي في قلبه!
علشان كدة قدر يودع حبيته في المطار..
ويحب بعدها كثير..
ويكتب في آخر كل سكة
نُقطة.

«فلمنجو» ميعرفش يرقص..

لكن بالصدفة طلع صوته حلو..

سمعتة بيغني للشيخ إمام، وشفته بيوشوش أول ضفدعة عملها
بورقة بيضا..

وسمعت كمان الضفدعة بتوشوشه بسرها الي فتحله باب
الحكايات.

بالصدفة أو بالمحايلة، «فلمنجو» بقى أشطر ولد بيطبق ورق.

سألته عن الدنيا.. ضحك!

قالي: شربتها من كاسي علشان تفضل تجري ورايا..

قالي إن البنات هما مسامير القرنفل في كوباية الشاي..

وإن اسكندرية أول بنت باسها وحبها..

سألته عن القط الي جواه!

قالي: لو مكنتش لحقته كان هينط من البلكونة يقع على جدور

رقبته..

مكنتش محتاج أضرب الدنيا على دماغها..
أنا بس سبت الصدفة تلعبلي ديها وتحنجل..
حداشر شهر في الجيش بطبق ورق للعساكر وأعملهم الشاي،
أجيب فلافل وجرايد للظباط في الكتيبة،
كنت لوحدي..

وكنت عارف إن حلمي أثقل من المركب!
كتبت اللي نفسي أعمله في نوتة زرقا:

١- أروح فرنسا.

٢- أطلع في برنامج شبابيك مع سلمى.

٣- أعمل نجفة بالورق.

٤-.....

كل ده عملته.. بالصدفة أو بالمحايلة.

وبالصدفة أو بالمحايلة اتبسّطت.

ورُحت لأبعد من فرنسا..

«فلمنجو» معندوش مشكلة مع الحاجات اللي مبتكملش.. الحقيقة

هو اللي بيقصد ميكملهاش،

مبيحبش يوصل لآخر الحاجات،

بيحب يحوش البدايات في برطمان إزاز.. يقفله كويس بعد ما

ينهي الحكاية بمزاجه، يطلع كل ما الدنيا تضيق..

يبصله بس ميفتحوش،

علشان لو فتحه يمكن يندم..

ولو ندم، يمكن ميعرفش يوزن نفسه برجل واحدة!

«جوزيف»؟

أول واحد فتح عينا على ضحكة العيال.
العيال اللي مبيسمعوش بيّفهموا الحكاية أكثر من أي حد.
والعيال اللي مبيشوفوش، إديهم بتحس بتنية الورقة،
التنية ساعات بتنور طريق..

الفلوس؟

حبة ورق.

«كيلوباترا»؟

صاحبتي اللي دايمًا مستحملاني حتى لما برمي أول شوية تبخ في
طرفها..

مبشربهاش عشان رخيصة.. بشربها عشان بحبها.

«فلمنجو» بيته مكركب..

بوسترات أفلام فرنساوي على أفيش فيلم عربي في الحمام..

صندوق «ستيلا» جنب التواليت بيسند عليه المناديل،

«لايف جاك» ورا الباب بيعلق عليه فوطته،

نجفة معمولة بطيارة ورق قديمة.. ونجفة تانية بالأوريجامي..

بوستر لـ «إيميلي بولان» على باب الشقة.

هي؟

كانت شبه «إيميلي».. وشبه الساعة البندول اللي سافرت وسابتها

ع الحيطة!

فيه غنوة بتقول: أنا حبيتك ولا اخترتك

لو حبيتك مش هختارك، لو هختارك يمكن أحبك..

الحب مفيهوش قرار.

لكن السلاسل بتخفق الطير اللي بيحب يمشي برجل واحدة ع

المية..

حتى لو كانت سلاسل ورق...

حكاية الولد أبو ودان صغيرة والبنت اللي قلبها مليون
حواديت

obeikandi.com

كان فيه مرة ولد جميل اتولد بودان صغيرة، كانت أصغر من ملامحه بكثير!

لما كبر حب بنت جميلة بس قلبها ثقيل. وعشان حبوا بعض أوي، لا هي أخذت بالها إن ودانه صغيرة، ولا هو كان عارف إنه هيتكعبل في حواديتها في كل مكان في البيت.

الحواديت كانت بتتكب منها على السجادة، فوق الرفوف، بتكرمش مفرش السرير، بتخبط بصوت عالي على الأطباق اللي بياكلوا فيها...

الولد أبو ودان صغيرة مكنش بيحب يتكعبل، ومكانش بيعرف يصبر عليها لحد ما ترتب كل حدوته في مكانها.. البنت قالتله إن الحواديت منكوشة عشان مش لاقية حد يسمعها. قالها: لميها وهسمعها..

البنت لمتهم كلهم جوه صندوق كبير حطته قدامه.. ولأن ودانه صغيرة معرفش يسمعها كويس..

نام من نص أول حدوته،

البنت اللي قلبها مليان حواديت اضايقت ومحاولتش تحكيه ثاني، ولا هو طلب يسمع ثاني..

جاتلها فكرة إنها تجمع كل الحواديت وتحطهم في سبت خوص مربوط بحبل تخين وتنزله من البلكونة.. قررت توزع حواديتها على الناس..

كل اللي كان بيمر من الشارع اللي فيه بيتها كان بيلاقى حدوته

تندھله من جوه السَّبْتِ.. حدوتة على مقاسه بتغير يومه..
عم «عادل» البقال، عم «كمال» بتاع الخضار، الراجل اللي بيخبط
على الأنابيب، واللي لحن حواديتها كان بيغطي على صوت صداها
في الشارع..

حتى العصافير كانت بتمسك الحواديت بمنقارها وتطير بيها لبعيد.
الحواديت كانت فرحانة إنها بتلمس السما، حتى لو وقعت تاني
على الأرض..

الحواديت بتفرح لما بتكعبل الناس،

ولما بتتفتت لحواديت تانية تكعبل ناس تانيين..

السَّبْت كان المنقذ المؤقت، الحل الأسهل لقلب البنت الثقيل.

لكن في يوم الولد أخذ البنت وسافر بيها لبلد بعيدة، البيوت
فيها مفيهاش بلكونات..

بيتها كان فيه شباك واحد..

أول حاجة عملتها لما وصلت إنها فتحت الشباك.. طلعت من
شنطة السفر السبت اللي مليون حواديت،

ملقتش قدامها غير صحرا!

الشمس حامية، والعصافير كانت بتستخبي من الشمس تحت
ضلة عتبة الشباك.. تبص ع السبت من بره، تنقر فيه وتطير..
البنت زعلت، وحواديتها رجعت مكربة جوه قلبها..

زَعَل الولد أبو ودان صغيرة كان بيكرب الحواديت اللي جواها
أكثر..

وشها دبل، وعلشان متزعلوش كانت كل يوم تصحى الصبح تزرع
وردة على خدها، وكل ما الوردة تدبل تزرع واحدة تانية. وشها

كان منور،
لكن في الحقيقة قلبها كان عجوز..
الولد أبو ودان صغيرة لما شاف كرمشة قلبها،
مكنش في ايده أكثر من طبطة...

obeikandi.com

عم إبراهيم

obeikandi.com

- «قوم رَوِّح يا عم ابراهيم»
- «مقدرش».
- «ليه يا عم ابراهيم!»
- «لو عديت من غير ما ترضى تحرقني»..
- «هي مين؟!»
- «هي.. اللي خلتنى أتوضى باللبن!»..

عم إبراهيم كان لازم يعدي على أي طريق سبع مرات!
رايح جاي، يقف يت رسم قدام الطوبة اللي عيال الحارة حطوها في
نص الطريق، ميعديش إلا لما اللي حطها هو اللي يشيلها!
يصرخ زي المجنون:
«ابن الكلب اللي حط الطوبة هو اللي يشيلها»..
«أنا عارف انه فلان ابن فلان الفلاني»..
يعيط بالدموع وينادي:
«قولوله يشيل الطوبة عشان أروِّح»..

وأنا دايماً فاكره في الشتا. لابس جلابية لبني وعمامة كانت بيضا
قبل ما تشم من لون الدخان على قد ما شمت..
قاعد في ركن دكانه جمب بواكي المعسل، يراقب اللي رايح واللي

جاي، صوته يجلجل من فوق عتبة الباب الخشب..

«أنا أعرف الحلوين من رجليهم»

ينادي على البنات الحلوة..

وأنا كنت حلوة، وطريق عمتي بيمر من قدام عتبه..

أمر قدامه بصندلي الأحمر، أغازل الكحل اللي في عيونه والتراب

اللي مالي اديه، أراقبه من ورا الدخان وهو بيحط الخشب في

المنقد.. يعاكسني ويحكي لي عن الجنية اللي عشقته:

«طويلة وخمرية..

تمثال أبانوس رايح جاي سبع مرات عريان قدام دكاني..

ورد المشي اللي مطوقني لحد دلوقتي!

رقبتها طويلة، عنيتها وشعرها لون البنفسج. على طرف شفايفها

حلق بيلمع، اللمعة دي أكثر حاجة كانت بتغويني وأنا في حزن

مراقي..

في نص الليل أصحى ألقيتها قاعدة فوق صدري، روعي مطوَّقة في

حلَّقها ورقبتي بين رجليها اللي متصلبة كيف الخشب،

تقولي: انزل.. انزل يا إبراهيم بات في الدكان..»

- «ها.. وبعدين يا عم ابراهيم!؟»

«انزل في عز البرد.. أفرك ايديا وأولع المنقد،

تهمسلي.. تقرب مني..

أشم ريحة الأبانوس في عرقها وأنا بتحشر وسط بواكي المعسل»..

الرَّحْمَةُ

obeikandi.com

أنا تخين.. وبكرش..

بس نضيف.

الصُّبح الي بيشقق ع «الرحمة» غير الصبح الي بيدخل معايا
من بوابة «كارفور»..

محدث بيحب ينصف وساخة غيره، بس المضطر ميقدرش يقول
يع !

المضطر بيحط دماغه في عين الكابنيه لحد ما تبلعه..
بيقف على باب الحمام يسمع تريقة الناس على كرشه وهو
بيناولهم مناديل مسحوا بيها قرفهم.
مش كل الناس بتغسل اديها بعد ما تخلص،
بس أنا بعمل كدة.

«الرحمة» في بلد تانية. «الرحمة» شارع بيطل ع الزباله..
مبيسكنهاش غير الي يشوف الدنيا من خرم بابها، وأوالي عنده
فيها محل ملك أو إيجار قديم (قهوة السعادة، كهربائي السعادة،
كوافير السعادة...)

ومابيزورهاش غير ناس عايزة تدخل الجنة على قفانا.
يرصوا عربياتهم الشيك بسوا الزباله قبل الفطار بساعة، يوزعوا
علينا علب فل بيضا فيها سمك ورز، مكرونة وفراخ وسلطة..

كتر خيرهم!

بيقولوا «سمرا» قبل ما يبجي «الرحمة» كان بنت هيلة بفستان
أصفر.. هربت من أهلها لما طلعلها شنب ودقن.. اتكسفوا منها،
حبسوها، قعدت تصوت لحد ما صوتها اتنشل منها، بعد كدة
طلّقوها في الشوارع تزعق للي رايح والي جاي، وتحدف على
الناس طوب وقشرب..
كانوا بينادوها سمارة الخرسا، لحد ما ركبت عربية أجرة من
رشيد، رمتها على أول الرحمة، شغلوها في قهوة السعادة وسموها
«سمرا» الأخرس.

أنا مبقدش معاهم ع القهوة.. مبتفرجش على الدنيا من تلفزيون
«سمرا»..

مابانامش على مراتبهم اللي المجاري نشعت فيها،
أنا بحط مرتبتي فوق..
جيب الدش اللي بيوريهم الدنيا اللي نفسهم يشوفوها،
وأتفرج من السطوح الواطي على الخلق اللي مش شبيهي...

عُمْرَ الْخَيْامِ

obeikandi.com

البنـت الوحـشة دايـمًا بتبقـى الخـيار الأخرـي.. حتـى في عـيون الولـد
الأسـمر الـي حبـها بعـد ما العـمر مبقـاش فيـه غـير حـبة سـنين
يدوب يقضوا..

وايـه يعنـي! ما هـو كـمان الخـيار الأخرـي لـي باقـي مـن أزيـز النـبيت
في أوض الفـندق..

يفضيهم في إزازة واحدة ويجري ع الشط الـي الناس بتصطاد منه
الكابوريا.. جمب الفلـل الـي لسـه ع الطوب الأحمـر..
يقـلع ملـط وينام ع التراب المـندي، يستـنى الكابوريا تطلع مـن
البحر.. تسرح على كل جسمه.. تزغزغه..

لما بنقلـع اليونـيفورم الشـيك بتاع الفـندق بنبقـى ناس تانيـة.. بنبقـى
غلابـة أوي...

أنا خريجة أحسن معهد بيعلم مساج في الغردقة. كنت أشطر
واحدة في البنات الـي معايا، الكابتـن كان دايـمًا يقـولي: يا «عاليا»
انـتي ايـدك تتلف في حـرير!

بس لما جم يختاروا بنات تشتغل في الفـندق الكـبير.. ماختارونـيش
أنا!

عارفين اختاروني امتي؟

لما الزباين اتحـرشوا بالبنـت الحلوة..

شغلوني عشان سمعة الفـندق.. عشان محدش هيبص ع البنـت
السـمرا الوحـشة الـي جيا مـن «سوهاج».. مش هيعوزوا مـنـها غـير
اديها الـي تتلف في حـرير!

أنا قلعت الطرحة مرة. اتحايلت على «عاصي» ياخذني معاه ع الشط..

مش بس الطرحة! أنا قلعت ملط زيه. شعري كان بقاله كتير ماشمش الهوا.. كل حة في ضهري كانت محتاجة تشم الأرض المبلولة تحتها..

استنينا مع بعض الكابوريا تزغزغ كل حة في جسمنا.. كانت بتجري علينا كأننا احنا كمان الخيار الأخير اللي ملقتوش جوّه البحر..

بصّ للسماء وقرالي بيت الشعر اللي مكتوب على إزاة البيت:
«سمعتُ صوتًا هاتقًا في السحر.. نادى من الغيب غفاة البشر
هبوا املأوا كأس المني قبل أن.. تملأ كأس العمر كف القدر*»^(١)

قراه بصوت عالي يوصل آخر السما. «عاصي» كان فاكر إني مش هفهمه. بس أنا فهمت.. وساعتها بس حسيت بيه.. عرفت ليه كان بييجي الشط يدور ع اللسعة دي من وقت للتاني! لسعة اللي قلبه دق لما أول بنت حبها شاورتله من البلكونة وادتله رقم تلفونها على صوابع إديها..

هي هياها اللسعة اللي بيحسها كل ما يشوفها داخله من باب بيتها في دراع راجل غيره وجرا عيلين وراها..

النت الوحشة كل حلمها تبقى الخيار الأول لراجل يديها أول

(١) من رباعيات الخيام

بوسة في الغواصة، يحضن إديها من أول الممشى لآخره..
لكن الولد الأسمر كان كل حلمه إنه يبقى أول واحد يفتح إزازة
نبيت..

البنات الوحشة كل حلمها تبقى الخيار الأول لراجل يديها أول
بوسة في الغواصة، يحضن إديها من أول الممشى لآخره..
لكن الولد الأسمر كان كل حلمه إنه يبقى أول واحد يفتح إزازة نبيت.

obeikandi.com

دار القنّاء

obeikandi.com

العيد الي فات.. لأ اللي قبله...
تصدقوا مش فاكرة أنا انضربت امتى!
بس فاكرة كويس مين فيهم اللي ضربتني، وعشان ايه..

بيقولوا «أمائل» قبل ما تتعين مشرفة على العنبر كان عندها محل
غلة في الصعيد، بتبيع فيه سمسم وقرفة وترمس مطحون وشبة
مخلوطة بمسك.. وتبيع كمان العدس اللي جاي من المدشآت..
أمائل مكاتش بتجيب عيال، هي قالتلنا كدة. لما بتكون رايقة
بتقعد تحكي وهي ماسكة كوباية الشاي في ايديها وتسرح...
كل مرة نفس الحكاية: جوزها اللي مات، «فوز» وهي داخلة
عليها بالجزمة الكب كب، المنديل الحريري أبو هتاهت.. أبوها
جبرائيل اللي بيطوح في عز النهار ويضرب في أمها وهي ساكنة..
اخواتها الصبيان ودكاكنهم اللي مبتكسبش، اخوات جوزها اللي
أخدوا محل الغلة وطردها من البيت.. شوال السمسم المدلوق
ع الأرض...
كل مرة هي هياها الحكاية بس بتغير اللي جوه الشوال..

أنا بيتي قريب من هنا.. ع الترام..
بس מבشش أقعد لوحدي..
من يبجي عيدين ثلاثة جاتلي غيبوبة السكر وملقتش حد

يلحقني، البواب كان مسافر لأهله في البلد..
بس مش ده اللي خلاني آجي هنا برجليا..
أنا جيت لما «أم صباح» ماتت، ولما مرضوش يعملوا فرشتها مقام..
قفلت البيت وبقيت أول كل شهر أقبض المعاش، أشتري شوكلاتة
وأخبئها من المشرفات في أوضة «أشجان» اللي جنب السلم..
من يوم ما جيت ورجلها اليمين في جبيرة!
وكل ما أعوز آخذ شوكلاتاية أنزلها.. وكل ما أنزلها تسمعني
قصيدة..
أنا كنت موظفة كبيرة في نقابة المهندسين.. لسه معايا الكارنيه،
ولسه بروح النادي من وقت للتاني أشرب شاي قدام البحر،
وأتفرج على بتوع البوفيه والعيال وهي بتذاكر..
أنا مش كركوبة، السكر بيهد الحيل،
وهو اللي خلا «أماثل» تضربني
«ريحة الحمام تفاح معطن!»
مرة دعيت عليها يجيلها ضربة شمس وقوت.. بس بعد كدة
زعلت من نفسي.. أصلها ساعات بتحميني وساعات بتغطيني وأنا
نايمة..
الولاد اللي بيزورونا في رمضان بيقوا زي العسل.. يجبولنا معاهم
شيلان صوف وعصير وجوافة وبسكوت.. الحنين ع السنان..
أنا قتلهم مفيش أحسن من الشوكلاتة بس محدش سأل فيا..
لو معدوش على كل السراير زمايلي يتقمصوا، وفيهم اللي بتقعد
تعيط..
أنا مبعيطش.. ولا بقعد طول النهار أحكي حكايتي وأقول شعر زي

«أشجان».. أنا أصلاً معنديش حكاية.
لا جوزي مات ولا عيالي سافروا وسابوني...
ده أنا كمان لا اتجوزت ولا جبت عيال.. أومال أمائل عملها
مناحة ليه بقى!
الولاد دول ساعات كمان بيدولنا فلوس.. زميلي مبيفرحوش بيها
زي ما هما فاكرين..
احنا بنفرح إن حد سأل علينا..
كل ما الناس تزورنا أشجان تقعد تقرا الشعر اللي كتباه لعيالها..
وساعات تقعد تغني أغاني شريفة فاضل وفايزة أحمد، بس في
الآخر برضه بتعيط..
«دوبني دوب يا هوا دوبني دوب.. ياما قلت أتوب يا هوا ما
قدرت أتوب..
آه لو يجيني منهم سلام.. يخلي جرح الشوق ينام»

أنا مش عايزة أمائل تضربني تاني..
هو العيد اللي جاي امتي؟

obeikandi.com

فرشة "أم صباح"

obeikandi.com

(١) بعد الحادثة:

أنا «صباح».. البنت اللي نورت السوق بعد حداثر ولد ماتوا في
بطن أمي..

كنت قاعدة على كرسي جمبها، وشي في وش المذيع أبو نضارة،
الي قالي احكي لي حكايتك؟

وبص على رجلي اليمين، بصة الي عمره ما شاف زيها!
بصة الي عايز عنيه تتملي بالدموع وخلص.

(٢) قبل الحادثة:

غوايش أمي تتهز ألوانها الفاقعة.. تنكش الهوا، في اديها الي
الزمن مسابش عرق إلا وحفر جمبه سكة..

رابطة شعرها بطرحة ملونة ولايسة العباية السودا الي عمري ما
حسيت إنها بتقلعها، مع كدة لا كانت بتتوسخ زيادة ولا عمري
شفتها نضيفة!

قاعدة قدام فرشتها تنادي على الخضرة النادية جوه حزمتهها..
«أخضر يا بقدونس»..

«يا بتاع المحشي يا جميل»..

«يا مجنن البنات يا بقدونس»..

«ورور يا جرجير»...

وقبل فرشة البقدونس والشبت والجرجير.. كانت في نفس المكان
عربية بطيخ..
أبويا كان يغطي البطيخ بملاية وينام جمبه ليليل علشان محدش
يسرقه، في عز الحر
وعز السقعة..
وفي يوم نام مصحيش..
كُنَّا في طوبة..
وأمي شَقَّتْ البطيخ ووقفت في وسط الشارع تنوح:
«قتله قبلها بيوم..
طوبة هتستلفك عشرة من أمشير تطلع جلدك نسير نسير»
«قتله قبلها بيوم..
جات طوبة ما بلت لي عرقوبة وخَلَّتْ الشابة كركوبة»..
«قتله قبلها بيوم.. بس هو مسمعش.. هو اللي مسمعش...»

(١) بعد الحادثة:

بصيت في عينه وأنا بحكي الحكاية مش عارفة ليه!
أنا كنت بلعب حجلة مع العيال جمب الدكان، صَهرنا كان
للمرجيحة اللي بتتأجر في المولد، الربع ساعة بجنيه...
ربع ساعة بس!
ربع ساعة مش كفاية عشان ألمس فيها السما يا «أم صباح»..
بس المذيع مكنش فارق معاه إني ألمس السما. المذيع جايني أنا
وأمي عشان الناس تدمع ع الحكاية المهمة،

حكاية الرجل البلاستيك..

- كملّي يا «صباح»....

«أمل» زميلتي رمت الطوبة في نص الحارة،

رحت ألحقها، حتة إزاز مكسورة دخلت في رجلي،

أمي جرّيت بياع المستشفى..

بعد ما غطوي الجرح الدكتور نسي حتة إزاز مغروسة في عظمي!

أنا في الأول محستش بحاجة من كتر البنج، بس بعدين لقيت

رجلي بتورم وتتنفخ قد حتة الشامام..

قالولي لازم تتقطع.. وقالولي كمان إن صوابعي هتموت وتقع

لوحتها.

هو ينفخ صوابعي تموت وأنا أفضل عايشة!

-كملّي يا «صباح»..

أنا لقتها بتسود وتكش زي الفاكة المفصصة..

بعدها قطعولي رجلي وقالولي هيركبولي رجل تانية أمشي عليها..

رجل بلاستيك!

(٢) قبل الحادثة:

أمي بتلف على رجالة السوق ووخداني في ديلها.. تطّلع كيس

الفلوس وتحلفهم، بعد ما تموت بينوا مكان فرشتها مقام.

والرجالة ع القهوة.. تنفرج وتضحك وتكمل لعب الدومينا..

تنادي: «عقلي أمك يا صباح».

(١) بعد الحادثة:

عنين المذيع رغرغت بالدموع..

قالي: نفسك في ايه يا صباح؟

أمي قالتله إنها معهاش حق الرجل البلاستيك.. وإن نفسي أعمل
عمرة..

بس أنا مكانش نفسي أعمل عمرة!

أنا كان نفسي ألعب حجلة مع العيال في قلب الشارع.

ونفسي أنط في قلب المرجيحة من غير ما حد يسندني.

بس ع العموم.. المذيع دمع قصاد الكاميرا..

زي ما كان عايز بالضبط.

(٣) بعد الحادثة بسنين:

أمي ماتت..

ورجالة السوق كل ما يبجوا يشيلوا الفرشة تطلع عليهم مستعمرة

حشرات!

الناس خافت لا الحشرات تتلم ع الخضار والفاكهة وتطلع البيوت..

بس بعدين شالوها.. والفرشة اتنست بأم صباح..

وأنا لبست غوايش أمي، ونقلت الفرشة برجل واحدة في قلب

سوق تاني...

سِلْمِ خَشْبِ

obeikandi.com

صباح الخير..

بقولها بأسلوبي من فوق برج الحراسة في ميدان البنوك..
«بِسْمِ اللَّهِ».. معايا رغيف بلدي وحتة جبنة بيضة.. «سيد» ابن
الجزمة جابهوملي بعد ما شال السلم من تحتي..
أنا مش زعلان من «سيد».. منا برضك بشيل السلم من تحته
بعد ما تخلص ورديتي..

كُلْنَا عبد المأمور..

أنا زعلان مِ الجبنة...

قصدي زعلان مِ الكرسي ورُكبي المتنية من قُصره..

قصدي من ريحة الصنّة في الربع متر الي مش عارف حتى أفرد
فيه سجادة صلاة..

«سيد» واد غلبان.. وأنا غلبان..

أحنا اللتين مضايقين من حكاية السلم دي..

لمّا ببص ع الناس من فوق ببقى نفسي أقولهم يا جماعة الشعلة
مش غيتي.. أنا عارف إن الدنيا بتستعفى عالي بيستعفى عليها..

الدنيا تحب الي يسايسها ويتحنجلها..

أنا غيتي صندوق حاجة ساقعة أقعد بيه في المحطة، بالذات
الرصيف الثاني الي مودي على بحري.. نفسي أركب القطر مرة،
ياخدني للهوا بالغلط ميرجعش بيا تاني..

كان عندنا جارة اسمها «ثريا» سابت الصعيد من زمان، اتجوزت

واد فواعلي من كفر الشيخ..

بس الواد ده مش جدع. لما جت تزور أمها قالتلنا إنها بتأخذ قفة فيها بطتين تلاتة وتسافر اسكندرية بالقطر كل خميس.. تترجع على رصيف المحطة، تنادي عالي رايح واللي جاي عشان يشتريهم وترجع بتمنهم آخر النهار..

ثر يا كانت بتحكي وهي مبسوفة! سألتها مبسوفة يا ثريا؟
قالتلي البط في القفة ونس..

مانتي بتبعيه آخر النهار يا ولية!

قالتلي مهو الواحد مننا لازم يبيع الونس عشان اللقمة..

هو احنا بنبيع الونس عشان اللقمة، ولا بندور في اللقمة ع الونس!؟

آآآآه.. لا القفة، ولا الحاجة الساقعة هاتليق على هيئة العسكري يا «ثر يا»..

«سيد» يقول إن الحتة الضيقة بتبقى براح مع صوت الست..

بيسيبلي الراديو بتاعه أتونس بيه.. أدندن معاها بليل، والصبح

أشغل إذاعة القرآن الكريم..

جسمي يقشعر..

أروح لآخر حتة عند النيل في بلدنا،

أنزل أستحمى وأرجع كإني عريس..

لما بتخلص وردية الفجر، قبل ما أروح بفتح سوستة البنطلون

وأتصير -لمؤاخذة- ع الناس في الشارع.. بتبسط أوي لما أبّل قرعة

الرجالة وشعور البنات الي لسه خارجة من الكوافير..
وساعات باتصير على بيريه الواد «سيد» لما يبجي يستلم ورديته،
قبل ما يحطلي السلم الخشب...

obeikandi.com

سَا

obeikandi.com

بلكونتها كانت في الدور الأول،
في بيت كبير.. يمكن أكبر بيت في نجع حمادي.
كنت أقعد أنا وأبويًا تحتها الساعة حداثر بليل، نسمع الست في
الراديو ونعمل كوبايتين شاي ع السبرتاية..
هي نفسها السبرتاية اللي أمي ماتت وهي قاعدة قدامها.. بس
كانت ساعتها بتعمل يبجي خمستاشر كوباية شاي للحمالين اللي
بيقطعوا القصب ويربطوه عشان يحملوه على ظهر «خليل»..
أيامها صحاب البيت كان عندهم جمل واحد.. أنا اللي سميته
«خليل»، عشان كان بيمشي يخلخل الأرض من تحته..
كان يقف في الحوش، يدخل راسه جوه بلكونتها ويتفرج عليها
طول الليل وهي قاعدة تذاكر.. بس هي عمرها ما حبته أكثر
مني، كانت بتقرف تطبطب على دماغه،
بتقرف أو بتخاف مش فارقة كثير..

أمي زمان كانت تطلع فوق التبة، تلبس ٣ جلابيات فوق بعض
وتقرف لحد ما تجليها الحزقة.. أبويًا مكنش بيرضى يقربلها لحد
ما تخلص منها العادة..
بس أنا كنت دايماً بنام تحت رجليها..
عرفت ازاي!
الأوضة الضيقة حيطانها فضاحة..

لما كانت بتخلص امتحانات كانت بترمي الكرايس كلها من
البلكونة.. كنا بنلاقي الورق الأبيض بيرُخ علينا زي المطرة.. ألهم
وأطلع فوق ظهر خليل أستهجي الحروف..

ساعات مكنش بيرضى، كان بيرفضني.. أقوم واخدة الورق كله
وطالعة ع التبة، أفكر أمي وأقعد أبكي لحد ما عنيا تحرقني..

لما كانت بتستعص عليا كلمة كنت بسألها.. -ست البيت
الصغيرة-..

كانوا دايماً يند هولها كدة..

وهي كانت دايماً تجاوبني، بس عمري ما حسيت معاها إني فاتن
حمامة في دعاء الكروان..

أنا اسمي «سما» مش «أمنة»..

أمي اللي سمّنتني..

بس نسيت تقولي أطولها إزاي!

الظابط ممدوح حلو.. بس صايح.. أنا شفته بيصور واحدة عريانة
مع زميله جوه زراعات القصب!

كان لازم أقول لست البيت الكبيرة عشان متجوزوش الست
الصغيرة.. وكان لازم برضك أقول لأهل البلد عشان يزفوه.

مكنتش أعرف إنه هيموت في إديهم.

وايه يعني لما الست تبكي يومين!

وايه يعني لما يموت! منا أمي ماتت من غير ما تقول..

وايه يعني لما أعيش طول عمري أسمع الفيلم ومبكيش على
«هنادي»!

أنا مبحبش ست البيت اللي في البلكونة،

ولا أبويا..

ولا خليل..

بحب الديك «محفوظ» وهو بينقر طول الليل في خشب السرير...

obeikandi.com

بَعْتَرَةٌ مَطْرٌ

obeikandi.com

- «مش ساعات بتحسي إن نفسك الدنيا تمطر جواكي؟؟»
قالهالي وعنيه مركزة على إيدي وهي بتقلب بسرعة السكر مع
النسكافيه، في الملاج الأبيض اللي مرسوم على طرفه فرع شجرة.
كانت أول مرة أروح فيها «سان جيوفاني»، وأول مرة تبقى كل حاجة
مضبوطة أوي كدة. النجف نوره أصفر وقريب من الترابيزات اللي
مفارشها كاروهات أبيض x أزرق زي أفلام زمان، على كل ترابيزة
قرنفلاية خضرا ريحتها حلوة. حتى عمرو دياب اللي صوته كان
مالي المكان خلينا اللي جي مان يغيره ويحط اسطوانة لفيروز..
- «إديكي موجعتكيش؟»

- «وجعتني.»

- «طب ليه بتعملي كدة؟؟»

- «علشان لو النسكافيه طلع من غير وش هشربه وأنا متعكننة.»

ساعتها بصلي وضحك،»

والقطة اللي خبطتلي على الإزاز اللي يفصلنا عن البحر قالتلي
إنها فرحانة علشان صحيت الصبح لقت بيضة حمامة جمب
رجليها الشمال.

زمان اتغظت من «ريم» صحبتي اللي كنت بلعب معاها حجلة
فوق سطوح بيتهم اللي أكبر من سطوح بيتنا، لما ورتني بيضة
الحمامة اللي كانت مخيياها جوه خرم مدور في قالب طوب
أحمر كان محاوط برج الحمام اللي عندهم. ساعتها لقتها بتهش
حمامة وعايضة تبعدها عن الباقيين ولما سألتها ليه؟ قالتلي أصلها

حمامة خائنة، سابت صحابها وجتلنا ولو سبناها هتعلم حمامنا
الخيانة.

مش عارفة ليه يومها حسيت إن نفسي الدنيا تمطر جوايا.

لما رَوَحنا البيت وفتحنا الدرج الي كنا بنخبي فيه الشوكولاتات
واللبان والورد الناشف والجوابات القديمة، مسكنا شوكولاتاية
وقسمناها نصين، وكل واحد أكل النص بتاعه للتاني، فجأة لقينا
نفسنا بنصغر وبنتحول لأقزام جوه الدرج، ساعتها مخفناش
بالعكس،

ده احنا طلبنا من الراجل العجوز الي كان نايم تحت السرير إنه
يطلع ويقفل علينا الدرج ويكمل نوم..
لما قفله والدنيا ضلمت فضلنا ماشيين جواه ندور على طاقة نور
كنا بنشيلها في جيوبنا زمان.
ملاقيناهاش.

من يومها واحنا مبنحبش الحمام، وكل ما السما تغم بنجري
عالشارع نفتحله ذراعاتنا، وتحايل على الدنيا تمطر جوانا...

“فوز”

obeikandi.com

فدان قصب ضارب في قلب الحيشان..
بامية قصب حواليه مزروعة في الدرايبس*^(١)،
جانية واتنين وتلاتة..
أرض عفية زي صاحبته!
ريحة فروعها،
رجليها قوالب الشمع طلّه من بين الزرع،
كعب عالي وعريض، وججل فضة بسرافيل*^(٢)..
«فوز» اللي بتاجر حتى في التراب!
بترهن للناس الذهب والفضة وتأجر فدانها بالقراريط..
يوم ما رهنّت دكان «أمائل» كانت لابسة المنديل اللي غزلتهولها
بسنانة*^(٣) على باب دكانها..
صحيت الصبح، كوّرت المنديل من قدام، دَبت الكحل في عنيتها ودلقت
إزازه الريحة كلها على صدر جلايتها المفتوح..
الورد اللي على الجلاية.. كشكشة وسطها وشخللة أساورها..
«جبرائيل» معدي بيطوح..
الناس بتتفرج من ورا الباب المتوارب..
وابن «فوز».. راجع من طاحونة عم «مَلقي» يخطي وميهتمش.. جنب
شوال السمسم المدلوق..

(١) حزام بيحوط أحواض زرع القصب.

(٢) خلخال بجنيهات فضة.

(٣) إبرة كروشيه.

والناحية الثانية من الدكان،
شجر كافور ونخل عالي وبلح أصفر على الجنين..
وطاحونة..
تتلم قدامها الحريم بالمقاطف،
تستنى القمح خارج دقيق تحت الجادوس*^(١)،

وطواير ماشية للفرن..
طواير تانية لعصارة القصب..
حزن «أمائل»!
وخطوة «فوز» وهي خارجة من الدكان..
كَب كَب كَب...

(١) «الجادوس» هو آخر جزء في الطاحونة يخرج منه الدرة والقمح المطحون.

أعلى الأوقات- "سيرة بنات"

obeikandi.com

امبارح افكرتك..

لما الفيلم اللي بتحبيه جه على «روتانا سينما» افكرتك.. وافكرت شكل ضحكنا القديمة..

«أحلى الأوقات»..

لما شفناه في السينما أول مرة كلهم كانوا بيضحكوا.. وانتي الوحيدة اللي كنتي بتعيطي، ساعتها «سالي» اتريقت عليكي.. وبعدها، بقت هي كمان تعيط كل ما تشوفه..

افكرت كمان سهرنا في البلكونة لحد الفجر.. نرغي، ونحدف على الناس أكياس مليانة ميه وضحكة بعرض الشارع، كنا مؤذيين بجد..

ولما سافرنا «بور سعيد» في شم النسيم، كانت أول مرة تاكلي فيها من عربية في الشارع.. وأول مرة نشوف بلد مليانة بلالين ملونة كدة!

قبل ما نركب القطر،

نزلنا شربنا عصير قصب من محل قدام محطة رمسيس. ملاقيناش تذاكر كالعادة «فاطوِّقنا».. بس «فيروز» كانت عاملة حسابها، اشترت جرنان ولب وفول سوداني.. الجرنان قرت نُصه، وفرشت النص الثاني علشان نقعد عليه احنا الأربعة في ركن صغير بين العرييات.. وشنا في وش بعض، ورجلينا فوق بعض.. ساعتها «هالة» كانت قرفانة تقعد..

وهدومها..

وانتي.. انتي هتكوني خلفتي عيال قد الصراير ومحتاسة بيهم،
زي ما طول عمرك بتحتاسي بأي حاجة صغيرة..

بس المشكلة مش في كدة.. ولا في إن عمركم ما هتركبوا القطر
ما بعض تاني.. أو في إن «روتانا سينما» عمرها ما هتبطل تجيب
الفيلم ده.. المشكلة اللي بجد، إنك عارفة كويس إن كل واحدة
فيكم عمرها ما هتبقى مبسوطة..

قد ما اتبسطت زمان...

obeikandi.com

“مادليْنُ”

obeikandi.com

تلات بيان..

مرصوين بالطول على درب مش متسفلت..

سُقَاطة على كل باب..

بيت كبير متقسم على تلات اخوان.. بلكونته بتراسينا، كأنه طالع من

كتاب التاريخ..

وخالتي «لَمِيعَة» أم «مادلين»..

مرات عم «نُصْحِي»، اللي عنده دكان ع النيل،

أخو «مَلْقِي بَسَادَة» و «صَدْقِي بَسَادَة»،

واقفة انهاردة في زهر العروسة،

ترقّع روحها المجروحة، وتخييط الطرحة في الهوا في كُم بدلة العريس..

خالتي «لَمِيعَة» اللي مبكتش يوم ما غابت الخطيفة..

قبل السنة بستتين..

حطّت كفوفها في الطين،

ولبخة على دماغها ربطت فوقها عمامة،

خمسة،

عدد العيال اللي شالتهم بطنها..

وعدد الأيام اللي ربطت عليها حجر بملاية عشان متاكلش..

خمس تيام..

وقفت «لميعة» تندب بإيديها بنتها اللي خطفها الطوّاب*^(١)..

«عبد الخالق» الطوّاب..

قالوا عليه فقر على نفسه وع اللي حواليه!

يا ترى يا «عبد» عرفت تكسر الطوب على دماغ الفقر؟

يمكن!

الأكيد إنه حاول.

والأكيد إن تلت البيت الكبير كان فيه أوض تساع عم «نّصحي» والخالة

«لميعة» وأربع عيال..

أربع أوض شائلة ريحة «ادوارد» و«فاكهة» و«أنور» و«عايدة».. أربعة

بس!

«مادلين» من يوم ما شافت نور الدنيا وهي بتنام في حضن أمها..

ولما عبد الخالق جرب يناغش خشب التراسينا، من دون البنات ناغش

«مادلين»..

قالوا عليها خطيفة المسلم اللي معرفش ربه..

لكن الحقيقة!

الحقيقة اللي كانت هتضيع مع العمر لولا الغريب اللي حكاها..

إنها:

ركبت معاه عربية أجرة.

خدها لوكاندة في بلد بعد بلدهم ببلدين..

عنيه الواسعة..

(١) الشخص اللي بيصنع الطوب.

حضنه اللي مَلمسهاش!
البت عشقت الولد،
والولد طلع عايز فلوس.

والحقيقة:

إن «ادوارد» اتجوز أخت جرجس بنت عمه الدميمة، علشان يحمي
سيرة الخطيئة..

والحقيقة:

إن مادلين فرحها انهاردة على «جرجس».. يمكن تجبر بستر الفضيحة
قلبها الموجوع.

والحقيقة:

هي اللي هتخلي الطواب يموت مسموم في قلب داره..
و«ادوارد» لحد آخر عمره..

يمشي مكشر في قلب الشارع...

obeikandi.com

حِكَايَةُ الْعَفْرِيتِ

obeikandi.com

وكأني صعلوك قديم متداري في تليفعة شيخ، وكل شيخ وله طريقة،
وأنا طريقي أتعلق باللي مبيحيش..
عفريت يهودي صاحب جدي من سنين. قابله وسط محصول
القصب وحلف ليصاحب عيال عياله..

ساحر عراقي ساكن في شارع الهناجرة. كنت يومها عيل صغير
متشعلق في دراع جدي، دراعه مسنود على راس عصاية، والعصاية
غارسه بعزم ما فيها في قلب التراب..
جدي سأله ازاي يطلع الكنز المدفون تحت بيته؟
«تسعة وأربعين جنيه ذهب، حُطهم في صُرة مربوطة وارميها في
النيل»

بخور.. ديل الستارة.. البيت بيولع.. شوار «مِشمش» بيتحرق..
جدي لسه بيدور ع الكنز!
الساحر كتب طلاس على ايده.. فضل يتعرش لحد ما وقع من
طوله..

وكأني كعروب متعلق بجلابية «رعراعة».. مستني خلخالها يلمس
الحتة الساقعة اللي جوايا وهي بتلم الكعاريب من الغيط..
يناغشها، ويديها على قد نيتها..
ونيتها خير، بس الود مرضيش يلمسني أو حتى يهوشني من
بعيد..

أول مرة سمعته كان في الحمام، إداني شلوت لقيت نفسي مقرفص
في الركن..

من يومها مرضيش يفارقني.
جدي ورثني الهم وعفريته يا «رعراعة»!

شيخ جاينله شيخ.. يقرأ ع العسل ويرقيه..
إداني برطمان أكلت منه. حط طرحة على راسي وقرا سورة الجن
كلها.

أنا كنت بترعش زي جدي بالظبط!
كتبلي حجاب بحبر أحمر، دوبه في الميّه وحماني بيها..
قتلته متسبنيش لوحدي في الحمام، شديته من جلابيته.. وقع.
دماغه اتخبطت في رجل الحوض.
خيظ الدم بيجري عليّ..

حد تاني اللي كان بيكب الميّه على دماغي يا «رعراعة»..
وأنا كنت بترعش.. أترعش..
زي مولود حطوه في التلج...

بتا بتي...

obeikandi.com

«كان فيه مرة ايه؟ خنفسة..
راحت قالت لمامتها ايه؟ عايزة آكل كفتة..
مامتها قالتلها روعي تحت ترابيزة السلطان واستني حد يقع
منه كفتة..
فضلت ماشية ماشية ماشية.....»

بِت بتي حبستني في العشة.. لما دخلتُ أحط للفراخ قشر البطيخ
والميه سهتني وقفلت الترباس.. قولتلها افتحي يا زينة البنات..
وقفت تضحك..
راسي خبطت في سقف العشة الخشب، زهري المحني وجعني،
افتكرت بناي الي سافروا..
«زينة» بتضحك.. قعدتُ ع الأرض جنب السمانة السودا.. عيطتُ..
«افتحي يا زينة البنات»..
معرفتش تفتح الترباس.
وقفت بره تعيط وأنا أعيط..
أنا أعيط وهي تعيط..

«فضلت ماشية ماشية ماشية.. شافت مين؟
شافت الفييل. الفييل قالها ايه؟

يا خنفسة يا ست النساء، تتجوزيني وأجيبك كِسا؟
قالتله هات مهر في كُمي وأنا أروح أول لأمي.....

خط الدقيق كل مرة عارف سَكته.. بين أوضة الخبيز وأوضة
الأشكيف..

كل مرة تخطف المنخل من عَ الطبلية وتجري، وأنا أجري وراها..
قدام الحوض القصير كنت بغسل المواعين وأحكيها حواديت:
«حدوتة ظَبْنَا وكَلْنَا»، «حدوتة الديق والسبع معيز»، «حدوتة
الخنفسة ست النساء»..

كان عندها دولاب مشمع أبوها جايهولها من «الكويت».. كل يوم
تفضي كل هدومها ع الأرض ونرصهم من أول وجديد..

«مامتها قالتلها الفيل ده كبير خالص وتخين خالص مش هينفع
تتجوزيه....

بِت بتي وشها طبق ورد، كانت بتحب تاكل وهي واقفة ع
الكرسي اللي جمب سور البلكونة، تبص بجنبها على الشارع..
ضهرها للعيون اللي طلّ من ورا الشُراعات..

«فضلت ماشية ماشية ماشية شافت مين؟ شافت الحصان..
الحصان قالها ايه؟

يا خنفسة يا ست النساء، تتجوزيني وأجيبك كِسا؟ قالتله هات
مهر في كُمي وأنا أروح لأمي.....

بِتِ بَتي أمانة..
تاهت مني في سوق السمك، كنت بنقي البوري من القفة، لفيت
ورايا ملقيتهاش! رجليا ماشليتينش..
ولاد الحلال لقوها آخر السوق بتتفرج ع المنخلول و«سمارة»
الخرسا..
خدتها في حضني وقعدتُ أعيط.. وهي تعيط..
أنا أعيط وهي تعيط..

«مامتها قالتها الحصان ده طويل خالص، وعنيه أوسع من عنيكي،
مينف عش تتجوزيه...»

لما كملت ٣ سنين أبوها وأمها خدوها عشان تسافر وتخش
المدرسة.

«فضلت ماشية ماشية ماشية لحد ما شافت مين؟ شافت الجعران..
الجعران قالها يا خنفسة يا ست النسا تتجوزيني وأجيبلك كِسا؟
قالتله هات مهر في كمي وأنا اروح لأمي.. مامتها وافقت، وراحوا
تحت ترابيزة السلطان وأكلوا كفتة وعاشوا في تبات ونبات»

شدوها من حضني ع السلم. غضبت على بَتي وجوزها سنة
باتناشر شهر.
«زينة» هي الوَسن.
الشنط متحملة فوق العربية..

شاورتلي وهي بتركب..

كانت بتعيط..

العربية بتبعد..

وأنا بعيط...

obeikandi.com

حكاية البنت اللي عندها شامة في قلبها..
والولد اللي في كَفه اتناشر حسنة

obeikandi.com

وكأنها عرق خشب ماشي عكس اتجاهه..
وكأنه اتخلق علشان يشيل الصوف الميت من على كُم جاكته
قديمة!

الغريب.. انهم متقابلوش فوق ظهر السفينة اللي كل واحد فيهم
كان واقف في طرفها.

الولد اللي عنده اتناشر حسنة في كفه الشمال كان معلق كاميرا في
رقبته وراكب البحر يدور على وش الدنيا الحلو فوق ظهر سفينة
بتلف الموالي..

البت اللي عندها شامة كبيرة في قلبها كانت متشعلقة في سور
السفينة، بتتفرج ع البحر وتحكي لصاحبته إنها بتنطفي.. وتحكيها
عن «ذات»^(١)، بالذات اللقطة اللي بصت فيها في مرآة الحمام
وقالت «وأنا مين يجددني؟».. واللقطة اللي جربت فيها نضارة
كانت لايقة عليها من سنين..
واللقطة اللي المفروض صاحبها ياخذو فيها الكورنيش بطوله وهي
محتارة:

هي فعلا نفسها تكون شبه اللي بتتمشى معاهم؟

(١) مسلسل تلفزيوني عن رواية «ذات» للكاتب صنع الله إبراهيم.

هي شيفاهم مش مطفيين زيها؟؟

وكان الحل إنها تعيش لوحدها، في بيت مدهونة حيطانه بالنيتي،
الدهان متقشر كأنه من زمان، بس هو مش كدة.. متعلق عليها
براويز لصور قديمة (أم كلثوم، فاتن حمامة، عبد الوهاب، المراكبية
في أسوان، أنور وجدي، ترام الرمل القديم،.....الملكة فريدة)
كلها بالأبيض والأسود لكنها لسه مطبوعة أول امبارح..
المرايات إطارها فضة بس اللمعة الزيادة بتفضحها.. والنجف
نحاس بس مش من خان الخليلي..
نور أصفر.. ديكورات أصيلة لمطعم مصري في بلد بعيدة...

حل تاني: إنها تسيب كل حاجة وراها وتركب البحر تدور على
فرصة تمثيل.. فرصة علشان تاخذ المسرح جري بطوله لحد ما
تنهج، كل النهجان اللي المفروض كانت تنهجه من سنين..

بس الولد والبنت متقابلوش على ظهر السفينة!
بعد ما لفوا مواني البحر الأبيض كلها
رجعوا اسكندرية،
واتقابلوا في الشارع الضيق اللي بيطلع على «كوم الدكة»..
بعد السلام..
مغارة الألوان...

البيت القديم قصاد البيت القديم..

في الشارع الضيق بيتها كان نسخة من حلمها..

أما بيته فكان مليان برطمانات إزاز..

صوت محمد فوزي، وريحة السكر والفاكهة المطبوخة بيتسربوا

من شبابه في نص الليل..

الولد اللي عنده اتناشر حسنة في كفه الشمال كان يبحب يطبخ

المربي البيتي ويعيبها في برطمانات يوزعها على الصحاب والجيران..

توت، فراولة، مشمش.. جزر أحمر، برقوق وبرتقان...

لما شاف البنت لأول مرة مكانش فاهم ايه اللي يربطه بيها

بالظبط!

الشامة؟

ولا المزيكا اللي بتلعبها بخطوتها وهي طالعة سلام الشارع،

ولا ريحة فص البرتقان الممصوح جوه قلبها!

البنت اللي عندها شامة كبيرة في قلبها كانت محتارة ازاي ترجع

للولد برطماناته بعد ما كلت كل المربي اللي جواها..

بصت لصورة جدتها المتعلقة ع الحيط، افتكرت أول حبة زتون

داقتها من اديها..

رصت الخضار على الرخام الناعم.. جمب الخل والتوم والزيت

والملاح..

عملت كل أصناف المخلل اللي اتعلمتها من جدتها وهي صغيرة:

لمون بالعصفر، فجل أحمر، لارنج بالملاح، زتون بحبة البركة....

كأنها كانت بتشرب الحزن مع الميه..
الستارة لما تنسى تفتحها بالأسابيع..
الفازلين لما يبطل يجيب نتيجة مع جلد الكعب المتشقق..
وملعة الروح.. وهي بتنظفي منها بشويش بشويش..

قبل ما تقابله على ناصية شارع فؤاد، كفها حاضن الاتناشر
حسنة في كفه..

وهو بيبوس الشامة الي في قلبها ويزرع جمبها شجرة برتقان...

obeikandi.com

obeikandi.com

الفهرس

- ١١ طبق الحنة.....
- ١٥ تحت السرير.....
- ١٩ نوتة زرقا.....
- ٢٥ حكاية الولد أبو ودان صغيرة والبنت الي قلبها مليون حواديت.....
- ٣١ عم إبراهيم.....
- ٣٥ الرحمة.....
- ٣٩ عمّر الخيام.....
- ٤٥ دار الهنا.....
- ٥١ فرشة «أم صباح».....
- ٥٧ سلم خشب.....
- ٦٣ سَما.....
- ٦٩ بعثرة مطر.....
- ٧٣ فوز.....
- ٧٧ أحلى الأوقات.....
- ٨٣ مادلين.....
- ٨٩ حكاية العفريت.....
- ٩٤ بتِ بتي.....
- حكاية البنت الي عندها شامة في قلبها.. والولد الي في كَفّه
- اتناشر حسنة..... ٩٩.....

CD

- أداء صوتي:

زينب فرحات
كريم أبوكيلة
إيناس حلیم

- عازفين:

عود: أدهم الحبشي
ناي وكلارنيت: أحمد ممتاز
كمان: أندرو عاطف
كيبورد ومؤثرات صوتية: بيتر ملاك

- هندسة صوت ومكساج:

سمير نبيل
عمرو شاهين

- تنسيق وتوزيع موسيقي:

كريم أبو ريده

الكاتبة

- *إيناس حليم كاتبة سكندرية من مواليد يوليو ١٩٨٣ ، حاصلة على بكالوريوس هندسة قسم الهندسة المدنية.
- *حصلت على جوائز في القصة القصيرة من ساقية الصاوي ومركز طلعت حرب.
- *نشر لها قصص ومقالات في جرائد ومجلات ورقية وإلكترونية.
- *صدر لها:
- «يحدث صباحًا» مجموعة قصصية عن الهيئة العامة للكتاب- سلسلة كتابات جديدة، القاهرة ٢٠١٣.
- «أحبني لتعرف من أنا» مجموعة قصصية عن دار المصري للنشر والتوزيع، القاهرة ٢٠١٠.
- *تم مشروع «تحت السرير» بمنحة من مؤسسة المورد الثقافي- مجال الأدب، دورة مارس/ أذار ٢٠١٣.
- *للتواصل مع الكاتبة:

Enashaleem83@gmail.com

بتكتب رواية أو قصص أو مقال ..
بالفصحى , بالعامية أو حتى بالإنجليزية ..
بتحب تكتب , أو تعرف حد بيحب يكتب , كلمنا ..
هنعمل كل اللي نقدر عليه عشان نساعدك تحقق حلمك وتكون
كاتب معروف ..
لأن في كيان , للإبداع مكان ..

اتصل بينا على :
محمول: 01005248794 – 01001872290 – أرضي: 0235688678
www.kayanpublishing.com

وابعتلنا على :
info@kayanpublishing.com

وتابعنا :
كيان للنشر والتوزيع
www.Facebook.com/kayan.publish
[Twitter.com/kayanpublishing](https://twitter.com/kayanpublishing)
www.pinterest.com/kayanpublishing
instagram.com/kayan_publishing